


16
2762
2



門 八 16
號 2762
卷 2

葉忠節公遺稿卷三 文類

男芳輯錄

上海縣志論四則

官師

國家得才吏易得循吏難才者為政雖能移易耳目騰
譽近遠然擾之非安之也在昔東里西門穎川蜀郡其
所以庇民調俗十倍後賢而不以才顯獨以循著居可
知矣我 皇上煥發德音 御書清慎勤三字宣布中
外臣工蓋謂百爾有位修此三者故全也大哉 王言
與孔子所稱道德齊禮將無同乎上海自升縣迄今長
吏項背相望政績可紀者六十餘人已爾甚哉循吏之

昭和十七年
三月十一日
購求

難也而且教養既分師儒充位語云經師易得人師難求自古憾之矧今日乎故官斯土者名氏爵里無弗列其治狀洵美有實效者目曰名宦使後之君子觀感而興起焉作官師志

選舉

選舉之途其類有八大約立德立功立言三者得其一皆足以名世夫賢良方正孝弟力田漢法盡善以施於今勿效也科目一途明洪武初旋廢旋復而名公卿大夫多出其中積而畸重殆銓注者失其平也我世祖章皇帝下詔新進士毋授部曹先試民社虞廷之敷奏明試何以過茲今裒集諸途分類詳列封廕附焉夫姓氏得與於茲編士大夫之榮也試循名以責實不當憬然擇所立以名於世乎作選舉志

人物

王者君萬國子萬民一日二日萬幾繫良股肱是賴然廉平守職無所短長者衆矣若夫清風亮節彰著朝野上倚以重下託以安雖崇卑中外有殊焉其功在社稷一也故首名臣於是宣風導流停澆激薄自士君子以至委巷細民奮其孝義廉節之性爲史策光君子於以觀風俗焉次獨行爾乃文章之士山林之客含咀六經畋漁百氏或歌咏太平或抗情肥遯不容以語默軒輊之次文苑隱逸而且類聚羣分聞聲而來樂土一術以

衍箕裘賓至如歸小道可觀也次流寓次藝術他如婦人女子蒙化被澤知天不可奪茹藥捐軀始終一致與殺身成仁者何多讓蓋德化之成也故次列女至於仙釋二家漢唐流毒非宜訓世然舊志所存亦不敢逸姑存一二以俟能言距楊墨者作人物志

藝文

自漢噓秦灰魯壞孔壁而載籍漸顯孝成帝使謁者陳農求遺書於天下命光祿大夫劉向步兵校尉任宏主之後向子歆嗣其父業著為七畧大凡三萬三千九百卷魏氏代漢秘書監荀勗分為四部合二萬九千九百四十五卷至宋元嘉始廣為六萬四千五百八十二卷齊梁以降隨聚隨散故隋開皇三年奇章公牛弘陳說五厄表請購書每一卷賞縑一匹至唐而大備計四部目錄合一萬四千四百六十六部有八萬九千六百六十六卷宋逮元明秘閣無專官零落猥雜莫可稽考矣嗟乎自有書契迄今世數如此其久天下如此其廣而藝文止此況區區一邑乎昔周易失說卦三篇得之河內女子古文尚書二十五篇濟南伏生所誦止五篇相合梁鄱陽嗣王範得班固漢書真本獻之東宮命劉之遴張纘到溉等叅覈異同具異狀十事以知承譌襲舛者比比矣今按舊志所載續諸新著分為四部以論定焉

焉

題李梅堙臺山日記詩冊

歲癸亥之吉我皇上將臨幸五臺為民祈福也山徑
 逼仄不能受輿命泣斯土者刊山堙谷去險即平以通
 輦路於是乎梅堙先生有臺山之役是役也勞費倍常
 等先生徒步經晝寢食俱廢十八日而告成斯時跋履
 營度之不給奚暇登臨嘯咏哉雖然俗吏目前有山水
 而胸中則無文人胸中有山水而目前如寄故其紀行
 諸篇即景象以寫情事與寄深遠筆墨淋漓當與潘岳
 西征張績南征二賦並傳千古若徒以康樂始寧之遊
 山居之賦擬之殆非先生紀行意也梅堙展卷微笑曰
 子誠解人

題茅叔价像

茅以武
并致仕

茅子之庭有鶴有梧鶴鳴子和梧棲鳳雛茅子之室有
枰有爐枰閒勝負爐煮醍醐干將不試手握陰符科頭
跌坐遊心五湖故不貌凌烟之閣而偶成行樂之圖

題越山春曉圖

簡翁老父母史侯之宰我海邦也三年於茲矣仁恩翔
洽封內外懷德畏威而尸祝之者百萬戶而於我石筍
里之紳士耆庶禮遇尤篤平時餉一庖一蔬輒謝不受
有偵知今月十六日為侯誕辰乃聚謀欲循躋堂故事
而為文以壽之余曰古之民頌其賢君侯者有詩有歌
有謳有謠有頌皆單詞隻句出於士女之口采風者上

之天子書其績而褒異之末俗濫觴逞逞恣其雕飾盈
篇累幅假朝貴姓氏為光寵是使賢者與不賢者同貫
非所以愛史侯也是宜為圖僉曰圖若何而可余曰昔
米元章作楚山清曉圖氣韻生動至今寶之吾侯越人
也仿其意為越山春曉圖可乎僉曰圖之云何意余曰
侯之德文不可形而以繪形之於山仰其高於水挹其
清於雲烟知其能澤物於林麓卉木之蕃茁見其和而
且春暉乍舒蒼翠欲滴山翁開酌漁父扣舷皆欣然載
其樂生之心非侯德歟咸曰善若可圖乎余曰可於是
清河張某具絹素沛國朱某致丹青隴西閔某潁川陳
某安定程某供繭紙藏墨而余猶子某出其外祖家所

遺名蹟爲粉本使其爲之圖河南陸敬峰聞之扁舟造
余曰某雖家華亭然與史侯善慕其多最績而樂與諸
君共頌之知頌侯德者不第君一邑已也授余筆酌余
酒周旋一堂而吾十三人者或論位置或議點染或調
水墨青紫或凭几捉椅而觀凡十日而圖成因相與快
樂謂此圖足以頌侯之德而稍自遠於佞諛也某不計
工拙撮同事斯屏者之姓氏而識其端

題張蓉左壽屏

今人年五六十以往里黨親通並爲詩文以介壽者之
觴是亦詩人岡陵之義也然詩詠之而不必圖繪事之
興也今圖之而不復咏蓋以蓉老善詩不挾所短敵所
長也吾鄉嚴子滄培工於畫畫中未嘗無詩因相與延
致之整研席拂絹素以待嚴子矐目仰天若有所思既
而狂飲號跳脫巾濡墨移日而就雲山烟水生動瀟泐
噫技至此神矣是何異吳道子作嘉陵山水三百里一
日而成乎旣成示余余贊嘆久之因高吟賈曾渭水晴
光終南佳氣之句嚴子訝而請曰子曷知余命畫之意
也余曰余十年中兩使於秦渭水南山目中故物猶憶
浮清渭眺終南波光山色層見沓呈惜不獲與蓉老共
賞之意恒悵惘今子之爲此圖以壽蓉老使吾兩人如
共遊終南渭水之間嚮者之憾今日而釋豈居秦而懷
蓉老見蓉老而忘昔日所懷之地耶獨怪嚴子者足未

登終南目未識渭水縱筆遠摹景狀天合覺范仲立必
俟遊秦而得山之骨法不已晚乎雖然余知之矣蓋嚴
子與蒼老遊處久知其品之堅凝心之清曠氣度之藹
穆有如此圖即畫家所謂意在筆先景生意外不必盡
以終南渭水目之也何也晉隱君子宋令艾年八十餘
篤學不倦酒泉太守馬岌造見不納因銘詩於壁曰丹
崖百丈青壁千尋奇木蒼鬱蔚若鄧林噫嘻此圖之晴
光佳氣不即艾之丹崖青壁乎至若縮地量山畫波測
水則渭濱千畝無竹以棲鳳雛高山流水之間無清音
以寫吾弟兄三十餘年同心之雅亦畫者之缺略也余
詩不及蒼老當以詩補之

平涼諭士子文

爲勸實學以振文風做此窠以造後進事照得學古有
獲尚書所稱緣木而求孟子所戒故教亦無類而士惡
面牆雖通塞之運或不繫茲德業之基良亦由此况近
揆遠攬揚古托今確有同風了無異趣我 皇朝啓運
文命誕敷戶競藏修士爭鼓篋以故奎明東井墨燦西
園尺璧寸珠往往而有雲螭霧豹無地無之郊辰之間
八股中廢酉戌而後旋即施行道以暫鬱而重光運且
方興而未艾凡吾髦士敢外同文本道銜 命來此一
載於茲矣睹軋茁之成風憫懦薄之難振雖才謝達哲
而志屬群英故巡試所至扣囊傾腹面命耳提夫豈矜

炫已才取誚識者良欲化邊陲椎魯之習弘天子格
被之風也乃西履平涼徧閱多士貌誠猥鄙文更空踈
不曰業廢於貧寒則曰功輟於徭賦嗟乎古今文士不
盡膏梁天下寒儒豈皆鴛劣橫經負耒耕讀之事理不
相妨志道觀光遐邇之人情無所擇漢繼暴秦之灰燼
而賈董方繼班馬挺生唐承六季之波靡而王魏先驅
韓柳並起公孫舉於牧豕亦通春秋李密雖騎黃牛猶
讀漢史以知士貴自立豈關人門若但藉口單寒毋乃
暴棄且爾平涼豈繫僻陋七序之作昉於梁竦潛夫之
論著自王符皇甫謐帶經而鋤奇章公獻賦而遇士必
固窮始達人不擇地而生揆之昔賢何容多讓本道憫
爾放棄勗爾自新披瀝丹悰用告遠近尚鼓朝氣無嘆
暮輶

勸賑江右難民教

竊聞蒙難去鄉民罹大劫贍災拯急人有同心故矯詔
發倉罪獨寬於河內汎舟輸粟義不絕於秦封而况水
旱洊臻又濟之以盜賊流移載道實得之見聞者乎邇
者小醜陸梁公行剽劫因之大師雲集到處烽烟野渡
舟橫萬室妻孥同一哭荒村竈冷四郊樵牧斷千山轉
徙途窮盡灑阮生之淚化離中澤如看鄭俠之圖憫此
哀鴻疇無廬墓田園之念傷哉土著皆爲東西南北之
人富已無家貧且奚仰夢杳樓臺何所露宿沙眠悲籌

耕鑿無期鵠衣鵠面嗟彼瀕危老弱蟻聚江干堪憐在
襍兒童啼殘夜漏困乏王鴻之米瘴逼飢腸鐺無陸羽
之茶炎蒸枯腊飢而死非其正命病且疫共有隱憂用
是撫鎮以至司道府廳各衙門蒿目焦心捐貲救賑籌
畫已備無俟贊襄但本部銜命來度目擊此厄從大夫
後應切同舟分 朝廷憂敢辭越俎業已薄捐清俸不
過少潤涸鱗然私念來者源源瑣尾未歸於故土而助
者渺渺盤飧何補於飢夫自非聚沙以成邱何由救焚
而拯溺因思滕甫之席屋先約富民近如周忱之賑荒
亦賴大賈本部職司權務豈不知商旅之疲勞而心忍
流民又欲丐仁人之涓滴蓋以爲貧爲富財力各不相
侔而成已成人惻隱吾所自有用是不揣鄙陋妄擬老
生常談無非想望安全暫效頭陀苦行擬於季夏之朔
爰就東西兩廠各置甲乙二筒凡扁舟抵關輸斗米備
賑穴孔受物用杜侵漁編簿書名示無擅美樂助者多
不傷惠緣固隨心守約者量勿過慳數求無儉每至月
終悉出買米計所受之數給無告之民嗚呼乞鉢兩於
弘羊則白骨生肉但吹噓於鄒衍則寒谷回春仰藉慈
航共宣德意庶免夫獨爲君子之恥以自解莫展一籌
之譏倘謂爾指公以苛派敬謝人言或疑我掠美以市
恩有如皦日

封長白山表

康熙十七年

帝出乎震肇東方長發之祥王配于京咏西土受天之
祐我求懿德溯祖宗統緒所由來天作高山與嶽瀆公
侯而並重莫舉莫廢著之祀典八千歲以為春秋有報
有祈錫以嘉名億萬年垂之史冊神人胥慶秩禮兼隆
臣等云伊耆姜水姓隨育聖之居顓頊高辛名繫興
王之國推景亳之景命燕祀高禩歌豐鎬之豐功鳳鳴
岐隴夢黃蛇於廊衍史稱上帝之徵獲靈寶於陳倉城
建夫人之號由來山岳必有神奇自古帝王類多瑞應
至於新豐雞犬太公自愛屠沽即如舊社枌榆高祖惟
祠羊羸三神山上共譏海市之迷萬歲聲中莫悟蒿呼
之誕名山五千三百地不皆靈封禪七十二君禮無可

考虛勞漢使祭碧雞金馬之神遠笑宋儒誇紫雲黑龍
之瑞不知鬱葱佳氣定在春陵潏沔龍池自開興慶然
未有孝思水木極崇德報功之隆禮酌古今得錫封秩
祭之正云節宣二氣懷柔百神蒼璧黃琮式奠清寧
之位龍旂鼉鼓肅將俎豆之誠愾乎聞僂乎見覲謨烈
於羹牆不欲數不欲踈凜春秋之盥薦六龍飛蓋徧謁
諸陵乙夜齋宮永言列聖念守成而思創業謂人傑之
由地靈乃長白山瑞啓東陲寶曆資其呵護氣連北極
山神宜有褒崇專勅重臣載觀奇蹟經額赫訥陰之地
一嶺朝天遶五府虎石之旁三江入海鶴鳴雲外如引
使皇之車熊立池頭似接從天之詔乃誦綸音而瞻拜

雲霧初晴爰躋靈境以衰哀峰巒似畫土培白樺不讓
大夫之松露潤黃花疑是嫦娥之桂登其麓則五峰圍
繞移來匡頂香爐陟其巔見一水激泓絕勝天台鴈蕩
而且茂膺神貺受賜七鹿以歸因之拜別山靈回望五
雲不見真神奇之莫測為史冊所罕聞特諭禮臣會同
政府詳稽載籍務合典章流覽唐宋之名封博搜元明
之祀禮正封王謚帝之謬名統一神除興國弘聖之文
祀如五嶽牲器惟部臣是問庶羞則將軍制之盛典徽
稱達於九有報功介福永之萬年臣等職司方望禮昧
霾沉愧學山未至山景行彌切不與祭如不祭盼蠻維
虔然觀五禮之祀神祇以享以祀亦奉兩珪而祭山岳
或展或懸恥頌東封敢效顰于司馬願為小相竊附驥
於公西伏願磐石為基岡陵作壽仁樂山而心若谷靜
而能虛外備物而內致敬禮以將敬有孚顒若無忘神
道設教之心仰止高山爰繩燕翼貽謀之緒將見蓬島
仙雲時依宮闕終南佳氣日近樓臺綠石丹砂遂致諸
山之銀甕金泥玉檢常騰半夜之神光油然雲沛然雨
率土兆太平之象文作豐武作鎬萬年開有道之長臣
等云

等云

詞前風集

崇山峻嶺

崇祀鄉賢

臨潼周某

孝行弓裘才弘黼黻濯清流於渭北八水秋澄標峻節
於關西二峯雲聳捧檄而喜折腰同負米之心解組曰
歸北里樂飲醇之量被鄒魯之教身依俎豆宮牆斥佛
老之書心薄丹經貝葉花封畫永長畱下相之棠陰月
旦春温砣作中流之砥柱却懷金於暮夜清擬楊公卹
在祿之孩提慈同賈父觀其事功學問皆本聖賢故爾
廊廟江湖無非忠孝况乎後賢輝映曾叨三錫之榮洵
堪當代表章用配千秋之祀

延長薛某薛某

孺慕性成友于天植堂前嬉戲效老萊舞綵之歡陌上
春遊合程公折柳之對讀書而窺堂奧名滿秦關攬轡
而志澄清恩流楚甸瀛洲學士舊傳三鳳之稱竹逸騷
人立辨千言之論考其世德實本家風至於吾翁若翁
不愧薛包高義兄子已子何妨伯道無兒感舊解衣應
念一寒之范叔捐金焚券無勞市義之馮驩以至鞅堂
匪躬盡瘁涪州之役間關扶櫬魂銷蜀道之難資孝
忠允恭克弟占當年之星聚難弟難兄應今日之馳封
是父是子既允孚於輿論宜并祀乎鄉賢

靜寧州慕某慕某

某學擅儒宗行爲世法翠屏插漢秀鍾河隴之陰營室

分宵族衍新鄉之冑櫛遺風於曾閔堂上椿榮眷同氣
於姜田樓前萼韡雖青雲路杳共憐十上之才華而白
鹿名高羣仰六經之鼓吹振敷城之鐸清音如繞霽溪
鳴宓子之琴元韻長流洛水往者黑山青犢雲擾金明
木箭紙翎瓦全上郡方其捷書夜奏真成一戰之功不
謂大邑新除未綰半通之綬用是懸車粟里博聚生徒
築室婁湖廣施親故通津梁以利涉投藥石以活人泮
水碧芹香髦士上好音之頌村烟茆屋斷餓夫思饘粥
之恩惟仁如其仁乃孝以成孝某學舞斑衣重逢大被
居廬毀瘠豔傳白雀之雙棲同爨雍和爭羨紫荊之重
發負三郎責盡舉焚之拾幼安金一揮不顧至於馬少
游之處世鄉里稱爲善人魯仲連之射書東海名之義
士良由世德夫豈矯情更異者封豕薄城衆踰數萬安
平養士立散千金焚祝告天霧隱髯公之陣策勲飲至
烽消月氏之城此真可謂筆掃隨何劍寒絳灌者矣以
故美報不於其身餘慶克昌其後誕生元輔游歷上公
擁旄節於三江百城飲福接簪纓於八葉九命追榮是
父是子肯構肯堂乃祖乃孫允文允武久膺廊廟之絲
綸宜享宮牆之俎豆允孚物望實愜輿情

華州陳某

璞玉輝山畹蘭秀谷孝賡華黍家門沿萬石之風直擬
朱弦閭黨重二荀之論悼及泉之比化負土靡辭卹在

祿之化離分荆不萎以至旅魂泣月重歸故國青山迨
夫弱息飄蓬再返舊家烏巷早觀光於泮壁移乎鄒魯
遺風久蜚譽於前茅展也王楊逸藻檀溪居士立館延
賓栗里先生為詩命子於是叩便便之腹經笥晨開顧
朗朗之山墨莊晚築果獲三珠於厭火先鳴兩鳳於朝
陽看閬苑之花天上碧桃勾萌仙核紆大邑之綬縣門
棠樹連理靈椿鸞誥雙銜酣咏太平之日鹿車自挽逍
遙空谷之年允媿仲舉之清高如觀太邱之長厚以故
生為黎獻人欽月旦之評自宜歿奉儀型世配春秋之
祀瞻宮牆其不遠肅俎豆以居歆國典攸彰人倫永式

崇祀名宦

陝西按察使司于某

才不世出清畏人知辨水火以鑄書誰嗣子產學春秋
而用法重見于公况乎刑乃一成獄成非易法惟五聽
色聽為難惟得情則矜必求死中之活斯引經以斷獨
持天下之平雪孝婦之覆盆秦人感泣幸長孫之更律
唐法崇寬民自不冤草滿若盧之獄刑無失入鵠栖廷
尉之門觀其飭厲官方凜凜數言可入名臣之錄以至
振興士類殷殷三接依然弼教之懷憫內史之飢升斗
錙銖恩推老弱下乾符之令弓刀鼓板威靖萑蒲以故
一樹棠陰去而益詠百年緇好人有同情雖紳士恭請
於前在上臺以年遠事湮慎惜繁纓而良吏觀型於後

稽大典之酬德報功宜邀華表且遺愛既可徵而可信
去思以愈久而愈真在昔叔子遺碑淚隨峴山之石厥
後方平畫像香焚蜀道之僧非實有造於此邦孰任再
三之瀆或爲可傳於後世慰茲億兆之心芳型可擬前
賢崇祀堪推名宦

臨潼王某

飲源洙泗分席關閩遊萬石之間家人嗃嗃共三姜之
被兄弟怡怡奕世箕裘允矣專門之業中閨琴瑟穆如
在御之音學博而精品高而正能言距楊墨功在聖賢
願學惟程朱言垂法戒至於妖變皆息共知徐孝克之
誠棺櫬並營今感蕭建安之惠其焚券也原非市惠其
誨人也亦豈要名往者秉鐸淮南一瓊雪冷迨後懸車
好時舉坐春風惟至德之可師故傳經之弗替槐庭晝
永看玉砌之芝蘭楓陛春深降恩綸於霄漢寡尤寡悔
允爲鄉黨之楷模以德以言宜享春秋之俎豆

明華州州同知張應揚

志切農功力開水利憫旱澇之害稼灌洩無資操畚鍤
以鳩工胼胝不惜履行州境舊有兩河南距惟山北流
入渭東連太白西接石堤性湍悍以靡常逢夏秋而爲
厲民罹其厄力難自全乃其相泉源之高下因地勢爲
節宣不蓋不乘竭經歲之勞頓隨流隨築利合境之黍
苗遂使舉趾者無抱甕之艱築場者羨如墉之盛上同

鄭國之懿號渠以鄭名近仿杜預之芳稱里號
思益永遺愛猶存在昔白公賈侯傳竹書於奕禩許陽
王煥享廟祀於千秋惟其功在閭閻故得榮分俎豆我
皇朝悉心民隱加意循良不有所褒其何以勸况彼
都人士蒙利賴者六十餘年今公舉紳耆頌豐功者萬
口如一再查應陽係故明萬曆末年在任之官故公呈
援許登仕康熙四年入祀之例官雖隔代澤永今茲合
無比照俯順輿情躋之名宦俾黃童白叟獲慰戴德之
初心而庶尹百僚益勵親民之實政

旌表節孝

富平節婦賈氏

苦節可貞冰心不化定婚燕邸月雙眉曾畫西山歸省
嶺頭雲百兩遂將好時下車廟見榛修肅新婦之儀視
夜星明鳧鴈警良人之夢迨乎所天無祿身是未亡有
子方齷死難同穴悲啼辟穀豈慕赤松之遊勢面偷生
恨違白首之約於是永懷從一盡瘁撫孤一牕明月照
流黃莫乞鄰家燈火十斛暗塵生破甑不灰巧婦吹烟
其事姑也以婦代夫堂北種無憂之草其教子也以母
兼父階前看手植之花睦妯娌於閨中一樹荆花灼灼
撫兒孫於膝下盈除蘭蕙森森飲藥茹荼飽食貧家之
苦凌霜傲雪寒聞晚節之香計十七年以迄今茲念婺
婦百度春秋一生節操歷二十九年如昨日博史官千

年翰墨兩字恩榮人無間言禮宜旌表

一門兩節婦某氏某氏

名家閨秀望族女宗機上流黃曾伴書窗之火廡間井
臼相莊食案之眉鸞鏡分飛嘆藁砧之長往柏舟誓死
矢天日以靡他白髮姑嫜苦心同侍青春妯娌淚眼相
看雖着雨之荆花已爲腐草而凌霜之竹節不作瓊簫
燐火陰風修文郎夢魂常到晨炊夜績未亡人心血爲
枯而且脫簪珥以葬姑稱有無而中禮難乎一門之競
爽百二關幸此兩人異哉二姓之同心四十年如其一
日允宜旌表以勵世風

藁砧早逝冰蘖自持感妯娌之同心艱貞如一奉姑嫜
以沒齒節孝成雙寡鵠孤棲不負九原坏土幽蘭空谷
堪畱百祀餘芳雖五旬方滿之時窮檐無由自達乃六
甲已週之後公論歷久彌彰

孝子楊長

至性根心天倫脩德童年誦法即知天經地義之書壯
歲承歡獨遵夏清冬溫之訓觀其間關負米實無愧於
昔賢迨至擗踴終喪已克全乎孺慕宗族咸稱其孝鄉
鄰不間於言宜有褒揚用光孝治

薦舉

南鄭令韓某城固令徐某

官分庶職吏最親民故樂只之詩歌諸雅什循吏之傳

載在漢書莫不騰實蜚聲增金賜秩良以善有同好人
恥蔽賢也本道司衡文之任無察吏之權然查學政全
書內開

云

云

今某某邑處四衝之地時當兵燹之餘萬

目瘡痍畱心弦誦子遺待撫起白骨於荒原絕學方興
沐青衿以化雨賑窮簷之饑饉萬井炊烟飛孔道之糧
芻六軍宿飽屏偷驢摸犢之迹枹鼓不鳴憫賣兒貼婦
之情脫驟以贖因之四郊襁負各返故廬頓使百里殘
區還成大邑至於捐修文廟見泮宮芹藻重生灌莽之
場遴聘社師令藝苑衣冠復續弦歌之韻家知忠孝革
面革心士樂詩書中規中矩凡皆有功於文教真堪繼
美於循良輿論允孚實政具在伏冀俯垂清鑒遠慰輿
情使尹鐸文翁得居上上之考召父杜母亦成赫赫之
名

鳳翔令蕭某

扶風舊域東井雄疆地固要衝民亦孔棘自軍興以來
師旅雲屯糗糧日饋郵驛疲於供頓閭里困於轉輸村
竈涸魚學宮茂草不有循吏整頓末由某積序才勞來
領茲邑悉心經畫盡力綏懷振將絕之文風作已衰之
士氣顧瞻聖廟堂廡荒頽捐貲庀材聿新輪奐遂使泮
宮鸞嘖璧水芹香譽髦蒸然尊彝肅若本道較士彼邑
禮謁先師虔瞻廟貌歷觀俎豆之容親覩翬翼之美爰
遊齋舍旋講典墳而見明倫一堂軒廠閎麗棟宇維新

蠲潔清幽鼓鐘式序博士生徒歸功蕭令萬口一詞不
謀而合冀聞憲聽仰丐洪恩本道忝司文教端藉相知
情惡蔽賢恐同譏於文仲職非越俎效啓事於山公

葉忠節公遺稿卷三

葉忠節公遺稿卷四文類

男芳輯錄

與宮宗袞書

郊春言別彈指三年尺素一通愛逾骨肉及聞年兄改
授臺班心頗不憚然諦想侍從一官讀書爲職今日旣
非讀書之時則翰苑芸編不若烏臺霜簡爲有用經濟
也隨賦二章遙寄而戎馬危疆鱗鴻不度惜懷至漫滅
不可復讀耳今春抵南昌閱邸抄始知驄馬桓公又作
轉輸蕭相人事推移何有紀極可爲扼腕但敝郡前輩
如沈繹老亦曾移北門之席看嵩山之雲而宸眷自天
旋登宮傅侍書香案驟乘銅龍繹老今日之殊恩當即

年兄異日之寵數從來百鍊英雄類皆策勳中外幸勿以一麾介介也某久困圍城一身如寄狼烟晝黑笳吹宵聞匝歲驚憂貧病交并春仲跳身矢石之下出九死而一生夏杪入都故交面目俱改回思與年兄風雨論文情事如昨安得立促舍人之裝把臂快談傾此積愆念之望之

與佟儼若書

天涯聚散吾徒常事理無足悲所可異者意中不欲見之人往往無端而合又無端而留荏苒歲月不能遽別而意中所甚欲見之人則一聚忽散草草數言茫茫後晤良可悲耳弟別後於十三日直上螺川蒙中丞先容之札湖西使君艤舟以待風濤不驚布帆無恙皆洪庀也前過廬陵徧觀營壘土牆高築王帳低垂畫舫朱顏平沙綠醕戰場風味不謂如斯乃福薄書生見聞未廣憤欲投地悲來填膺不知帑藏幾何民力幾何而經如此坐耗也我輩弄三寸柔翰與夫長鎗大劍者勞逸勇怯固自有別不容妄談然殊不意名實背謬至此每思右文之日儒臣執經天子平決雍雍觀德甚盛難幾而有等豎儒乏晁董之經濟無江陸之才華自命文臣陵轍師武至罵為老兵不齒人列千古不平莫此為甚今茲右武何獨不然夫擁堅陷陣奪燾舉旗出身命以分朝廷憂吾輩當斂容屏息敬事之若僅坐守閨闈恒舞

酣歌高視濶步一見吾輩目爲書歎嗚呼此何足以服
書歎之心哉大抵今日之人視名利重則視氣節輕弟
生平鄙拙頗以廉恥自勵以唯諾爲恥往在曹署與人
時有異同不致靡靡繞指今身歷危疆事不關涉處不
得不唯諾之時作不得不唯諾之官惟有撫躬長嘆涕
泗橫流而已幸抵會城夙疾陡發特懇制臺稱疾免去
與先人營葬畢即投老荒村爲農夫以沒世耳過蒙年
兄惓惓之意且知吾年兄爲負氣節人故一傾區區以
誌同心之雅他日揚眉驤首砥狂瀾於末造建宏績於
聖朝使野老扶筇喜泣亦吾兩人一生嘉話也語過牢
騷心原忠厚勿等諸鷄音而棄置之臨風瞻溯

上江撫佟公書

某自分薄劣豎儒無足比數乃蒙閣下不加擯斥屢邀
三接之榮別荷百朋之錫而又千里走書丁寧慰勞非
甚關切計不至此忽忽自思感激生愧比聞閣下膚功
令聞朝野艷美蓋指今日江介廓清嶺嶠底定世俗之
就事論事則然也而某獨於節鉞甫臨之日竊窺舉動
雖當笑言晏衍之時有屹然難動之勢此種沈機定力
爲古大臣所難而閣下充然若取携而易者昔王文成
專勅開府縛岩際之黨猾而虔南晏如至今傳爲佳話
乃閣下力扼四衝計殲羣醜使戈船下瀨之軍過師旌
席之上叱離鴻鵠之輩延命黍谷之中空天無雲江險

如帶以今方古功相萬也惜書生命薄才疎不獲執鞭
珥筆鏡歌作露布與鐘鼎同其不朽爾

又

月初乘便肅函祇候情事頗詳及此月望後從郵使處
拜領手諭纖悉關心眷注倍切至讀二世兄來札具道
閣下鑒拔隆情始則不遺葑菲收之藥籠之中繼則俯
諒鄙私任其麋鹿之性以汲引之高舉寓憐才之苦心
某雖暴棄然銜恩如此官自同於木石耶每念少未讀
書倖博一第為郎十載懶性較添迂愚駭慙初不知天
壤間何者為巧宦何人為要津而登必元禮之門遇必
深陽之目故此番薦辟三事而下屈指及某無不同聲
獎借譽樗櫟為棟梁比鷓鴣於鸞鷲某感之德之然猶
謂在都十五年與諸公卿周旋久憐其愚拙不惜齒牙
未可知也乃某與閣下聚首孤城不逮三月傾蓋交談
遂如千古昔魏勃掃相門之塵禰衡漫懷中之刺杜少
陵投匭獻賦而曰惟願吹噓送上天俱有惟恐不得當
之慮某何人斯而漠然四千里外他人求而不得辭而
不得者皆適如所願坐而致之故雖自愧不才而又自
幸遭逢有莫知其然而然者一片感恩知己之心無可
報塞惟有仿古人紀遇體恭詠數韻以為報謝也

復陸敬峯

綠酒澆花紅牙度曲吟白雪之章無金谷之罰此時此

景僉云至樂而弟謂更有樂者蓋以弟與足下素未謀面扁舟渡浦適值花時乃蒙足下降高才令名之意氣俯而問迂愚荒拙之鄙人竊自驚異比時一得尊卷讀未終篇如華月當秋如夜珠照乘如花枝之映水如劍氣之燭天光芒不可掩抑及買舟北上屏去煩囂出卷細讀知足下之才識風骨有大過人者近來操觚家論文不曰平穩則曰圓熟曰綿密究之三者之弊不流爲陳俗拘牽不止足下心細而局大調古而句新故僭評數語原以第一人相期迨榜發獲售頗慙鄙懷然隨流平進誤落人後似與前言不符豈造物者以才與財爲枘鑿而故厄吾輩耶伏祈足下守此勿失則元少之座指顧可登矣兩蒙札示見索弁言弟何人斯豈敢靳此但賤性愚戇別白文理由語傷時且於古文一道深究數年未敢自信故遲遲有待足下春殿花秀之日弟當握管以記盛事也

與栢河東書

天涯岐路歷數舊遊相知之深孰如吾輩乃倏聚倏散如雲影從風萍踪逐水去來不能自主後晤尚復難期渺渺予懷一辭莫竟所以臨尊相顧淚湧聲吞直視無前鼻酸腸斷甚至滿堂絲竹猶帶哀音前導輿臺各擎淚眼論別非江淹所能賦語情則汪倫所不能過也獨念足下孤標聳峙有德無隣凡諸設施倍宜珍慎處懷

期物尤擴含弘遠大之量或基於此弟本儉荒難語閱
世然忠告之道當不以人廢言耳別後意況心思惡甚
難忍昏暮抵靈州憊不可支因留信宿特作數行以申
謝悃至於話別時所及彼此同情不復贅及反致愴懷
也沃意濃情淪肌沁肺又非往還尺牘所可罄書足下
當能諒之

與沈繹堂書

飽德飲醇歷有年所匆匆揮手悵悵倍常長至後乘便
草附數行以慰懸注乃不幾日而長安令持尊函見示
備悉先生起居佳勝且蒙遠念關切最深此情不敢一
日忘也閱邸抄知陳學士以憂去而先生猶戀宮端一
席理不可解得非遲其會以厚其報耶某於十一月之
杪較試奉天坐寒烟霜草之中對鵠面鶉衣之士衰敝
不堪付之浩歎然賤性迂愚不忍坐視講解提命為冬
烘先生所不屑為積勞一月夙疾有加藥餌服食殆不
能辦夫貧病煩勞義命所安也特一片苦心無可告語
當事者亦或以庸衆遇之則苦行頭陀未免喪氣先生
知愛有素何以教我切望切望嘉平廿三日復得一小
子想聞之色喜也

又

昨歲夏五旋里親友往還舟車如織應酬之苦倍於在
官秋冬以來經營先君葬事一手拮据儉不中禮過承

先生遠惠豐儀光及泉壤存沒之感毫楮難窮惟望北
九頓而已先生才爲帝眷位正宮端駮乘入銅龍之門
簪筆侍玉墀之上綸扉虛席清泰可知但聞夫人之訃
眷懷淑配悵撫冰絃悽悼必深料多患苦然兩公郎純
孝篤誠致哀盡禮幸稍節悲思爲國自愛某才拙性迂
時命多舛已絕榮利之懷不作春明之夢前段云云有
如逝水有虛屬望雅懷不勝愧感敬謝敬謝茲懇先君
舊與吾郡唐存翁先生金石至交故去歲拜乞存翁手
撰墓誌情事明確無踰此文意欲勒石永藏不墜前緒
而既得鴻章亟需名筆恃愛冒瀆乞乘公餘如式揮賜
使先君宦績鄉評藉以不朽而墨香毫綵下徹重泉豈
直某世世銜恩而幽壤神靈叨榮無既百叩上懇

與鄭山公書

弘農道左邂逅回鑣雖片刻笑談頗解飢渴想入都以
來起居住佳勝欣忭無似弟抵秦後徧讀諸貴門人佳墨
或古藻紛披或清空一氣全秦之人僉謂歷科未見得
毋風氣使然弟進諸生而告之曰才不擇地王不待剖
文章之風會大約以秉衡者之取舍爲趨今科兩主司
黜卑靡登古雅故諸生得見有古雅之文假令取舍反
是則羣習於卑靡而黃鐘大呂湮沒於斷烟荒草久矣
若輩何從見之又何從效之以是知鄭俞兩公之大有
造於爾土也及檢舊案則賢書之所登皆洪君之高弟

因憶道左之言良非虛語弟學淺性迂竊不自揣而欲仿此法以相士評閱詮次絕不假手一人甚而講解提命喉舌爲枯三家村冬烘先生所不屑爲者且甘心爲之如是而可昧心營私以抗顏諸士之上乎世路悠悠無可告語倘以逢迎未工而與庸衆人同類而訕笑之則苦行頭陀徒自苦耳

上吳大宗伯書

竊某資性龔鄙才命蹇鈍不煖木天之席浮沉郎署之中閱數歲矣往者備員屬司奉職無狀仰荷洪鈞矜其不能許以有造逮逢推薦曠典蒙夫子刮垢磨光首及微名雖某不才橫自暴棄而知已則甚於感恩也客冬銜命辭行夫子錫宴贈驂寵之以詩某何人斯當此隆遇今春復蒙振拔執簡親奏恩註上考雖什伯於某者不得比肩而並驅焉自念才不前人曲荷嘘植縱矢捐頂踵猶懼慙負恩私而况無萬一之報稱乎中夜起坐愧感橫集非尺幅片言足喻此意秦省素號荒殘加之以軍旅重之以輓輸士民救死不暇即省會要區而烟火可數官署數椽家累無置足之地典質服器僅廣六楹苟且栖頓其他可知至於士氣文風頽然索然無復人色某受事後歷考四棚勉竭心力諄諄講解評閱詮次不敢假手於人不敢因循一切天鑒在茲良心難昧雖甚飢寒安於義命不敢強也所望夫子憫其困阨鑒

其迂愚始終造就某固不忍自棄以負長者耳

又

伏念違離函丈涼暑載更瞻企斗微羽鱗一度履河冰而色戰踏塞月以神愴曠節愆情烏得無罪積憂茹苦良亦有懷側聞往來之辭頗招異同之論指包茅以問罪假圖籍而深文智掩法驅夫誰可免殘疆末吏尚復何言乃蒙夫子開初日之照砥橫流之瀾如見肺肝持以獨斷顯示繩墨發其良心引墜而升傳肉於骨比聞此信如返於幽以悠悠之心仰巖巖之象恩無以尚言詎能宣此某所以崩角雲霄灑淚壚壤扶九迴之腸不過一綫投七尺之體莫報二天也仁者之壽安有窮期弟子之懷永祈珍攝竊念某輪囷枯腐生本孤根偃蹇單寒身違萬里雖從前暴棄自斷丹梯然夙願駭癡妄希青簡以故受事迄今間關跋履霜風透骨一飽爲艱流塵浹肌勺水難致覩穴處鶉衣之侶坐荒陬筮屋之中徒使青衫笑人不知絳帳何物矣而某屏嗜浣華甘茶習勤不憚手口之煩不假親通之助擁敝裘而講解剪刀燭以披吟皓首黃童引致函席朱甲黝乙口與譏評雖曰勞煩匪求聞譽某自媿幼嬉失學是以澹營利簡將迎心死雕蟲目枯縹軸妄欲綜百氏之學成一家之言但使隻字單詞後有知者雖長貧極賤榮莫甚焉二十年常奉此意然學尚未充書猶未就者總由公私情

計侵擾百端撫卷臨毫未嘗不歎竊念學使一席原隔
滓塵從事三年獲免愆戾將韜簪篋組發笈搜籤匿影
松阿恣懷芸帙以娛螻蛄之年用酬燕雀之願則生無
所恨死不徒然縱慙裴世期不朽之書竊比劉孝標辨
命之論乃不謂飲冰奉職執玉修身猥以乾餼遂來衆
口向非元老之朱弦金矢主持其間則小子之苦蘗勞
薪銷亡殆盡天心朝憲尚可問耶伏祈俯鑒豚魚之誠
弘開藥石之論使得奉為著策永獲瓦全則被德周軀
沐膏到髮片蹠寸穎寧足殫乎瀝素披丹長箋申悃

又

秋中人到接讀手書垂愛有加感恩無地且知眷遇日
隆攝養彌善惓惓鄙私藉以盆慰某二年以來繁苦艱
辛久蒙洞鑒近以禁旅凱旋絡繹於道應酬之苦百倍
曩時今秋兩主司冰鑒精嚴甄收暗合榜首兩人為特
拔新進餘皆一等前茅其遺不得售者不過一二生耳
以故秦之士大夫悉歸功於某三載苦心不隨逝水某
素族孤根澹然營利當年博學一科荷蒙夫子虛心汲
引惟恐實不副名甘心暴棄致辜恩眷餘可類推若矯
前而競後舍易而圖難某雖甚愚未必至此但在外以
無心得之在內以奇貨居之則某寧安拙分不樂苟得
也夫子知之有素故輒肆狂言伏祈別白鄙悖主持公
道則一生品行藉此無慙感佩鴻慈曷其有極

上楊少宗伯書

伏惟圓行方止金剛水柔合如節符動則杻鑿物各此性人無異情每念悠悠不勝眷眷某自叨屬末久仗提携違離以來寢興結想而北指烏延西踰張掖朔方孤懸於河外梁中遠跨於巴中兩馬一車僕僕萬里曠情愆節遂隔載餘顧影懷悽能無惕若比晤徐茂州得去年夫子遠賜一書渥意冲辭濡毫潤楮讀至末行惋惜之語既自悔當年之暴棄復重貽長者之離憂不覺發汗浹背零淚交頤愧舊感之未填恨新恩之疊負忽忽竟日如觸風病狂不忍動默也永言宵旦其何可忘國事勞繁倍祈珍重近者側聞多口輒恣深文如某不才固宜獲咎乃蒙夫子靜照平衡推懷援手紐其將絕拯其欲沉此在鱗羽之微猶知環珠之報翳某何心寧不知感嗟乎某之爲某良已苦矣忝承先蔭僅續書香迨入士林屢遭世忌以故深知命薄幾與侯白同官而猶未斷名心欲使張融無相受事二載持戒六時雖鑿別未精取舍頗慎倘昧心頭之天便非衣冠之伍無如西塞苦寒北門多詠旣無長袖能免青蠅委曲護持止憑直道伏祈矜此樸誠賜之金石得免當門之鎌刈遂幽谷之枯榮則恩成終始感並覆幬矣

與汪昭案

分携以來涼暑再易昂首北眺惟見五雲先生物望久

推天才艷發際右文之世抒作史之長進退是非絜網
張目表記志傳含英吐華將成一家之言用成不朽之
業文人樂事何以加茲第一車兩馬徧歷窮荒艱苦單
寒有懷難訴耳目所觸發為巴辭不過抑鬱無聊之言
無當清廟明堂之作未敢請正大方以汗法眼試牘一
冊伏祈郅政

與李子靜

自違台範已垂六年瞻企岱宗宛在天際回憶昔時嗟
寒吹燠之思不勝浴仁被義之感但以越在西鄙遙隔
中台徒增馳戀之心莫遂晤言之願引領者三迴腸以
九閱邸報知先生榮晉三臺風高獨座袞補青蒲之牘
霜飛柏葉之珠日憲以貞中朝具肅某夙叨譜誼舊忝
同僚佇望朝陽不勝忭舞秦中風土荒涼人文弇鄙加
之以師旅困之以轉輸士氣旣頽文風何望某驅馳萬
里落拓一官雙袖垂風寸心如蘗命途乖舛夫復何言
獨是雖無精鑿頗解憐才取舍之間矢諸杲杲愛憎之
口聽之悠悠惟先生手握朱絃心操冰鑿敢呈肺腑用
丐齒牙倘邀一字之品題敢忘二天之銜結

與孫將軍

曩在寒窗讀管樂武侯衛霍韓范諸傳以爲良相用兵
如天運風雷颺忽震盪動合機宜其法莫傳其人難觀
及比年在都方張天討屢見捷書獲聞將軍血戰之勲

制敵之智低徊慨慕私心願見之使白面書生得以證
據燈牕記誦然而烟雲隴樹靚止未由跂望高麾猶之
想像管樂諸公可聞而不可見也幸於茲夏銜命渡河
摳衣鈴閣之下親識令公之容貌毅而恬心仁而勇漢
文所云真將軍者殆不是過乃蒙不鄙豎儒殷勤三接
推懷慰勞忘分下交開玉帳而肆瓊筵投金卮以當折
柳藏鉤博醉把袖傷離真所謂一日之情重於九鼎矣
而又曲賜溫噓過承隆獎直使相駑駘者忘其蹇劣聞
解推者亦假羽毛憶王粲之依劉少陵之寓蜀情禮雖
優未必至是將軍見待寵渥超古邁今自非木石之軀
能忘蛇雀之報乎七月既望肅勒蕪緘稍申謝悃然途
次匆匆未抒感臆於萬一也邇者楚蜀既平滇黔垂定
較百戰之庸錫五等之爵茅土河山行當首屈指於將
軍矣丈夫際會若此榮烈休光焜耀史冊豈鄙生叔孫
輩所敢望也某素族孤根迂愚無狀謬叨鑒賞報塞無
期祇奉寸箋以誌知感

與顏六齋

吳越畫地而居然烟水相接文物語言土俗嗜好不異
比隣也吾生也晚憶先生戾止敝郡時未獲奉道貌聆
教言竊嘗恨之乃不意眼中欲見之人忽遇之絕徼無
何有之地幸矣而傾蓋一談甘苦慰勞如生平之歡始
知投分有緣不以久暫也節承雅誼文酒笑言不去心

目一別差池又經旬月每當霜鐘欲斷風鬣長嘶新月
初規鴈聲過耳未嘗不流緬風儀高吟葭露晞言同志
當共此心七月既望肅有寸箋敬謝將軍暨我先生雖
荒緘短句寒素家風而知已感恩行間耿耿想能諒之
弟薄植孤根宦遊顛顛翔回萬里雙袖空垂營一買山
之資而終不可得未審投報當在何年也朔雲嚴寒諒
無虧攝臨毫吮墨屬有長懷

與王芝塵

客歲行踪倏忽靡定肇舉嘉禮簡率無文乃蒙親亭臺
此荒遠不加督過式懷汪度愧感何如逞在夏初停車
握管肅復蕪緘當塵清覽或能俯亮也公郎名家令器
而又束身敬業雅好讀書近所揣摩迥逾前製披衣欣
忭諒有同心茲以試期伊邇脂轄南旋復念往返長途
風塵良苦并携小女同歸亦是一勞永逸之計但弟遠
滯秦中未能躬送而寒舍別無親厚可與代謀恐從前
之踈畧未贖而此後之荒陋愈多熟商一法暫寓別庄
明春弟秩滿言旋身為營辦靡得成禮于歸德門似屬
兩便想高明俯鑒至情必當首肯耳

與陸集生

某生也晚不獲望吾鄉先達之後塵搗藻揚芬增飾神
智惟憶髫年課誦之餘先君子斂容危坐恣談時賢云
某也富於學某也工於文某也居官仁而廉動默分途

華忠宣公遺稿卷四
一四
圓方異用各有得失理不相妨獨於文定公先生少晚
仕學之志趣未嘗不掀髯擊凡三復歎盡善焉辛丑正
月偕計北上獲交於先生斯時春風猶厲涼月在窗把
酒擁爐譏評今古壯激湍颺微披象罔竊謂與先君子
所美文定公絕類某因携卷就正而先生吟賞再四獎
許踰涯在昔邕愛仲宣約憐何遜不是過也歲月遷流
奄忽廿載中間暫一相晤而先生燕吳晉豫南北其轅
求如往年風雨之夕歡謔歌呼了不可得去秋銜命
視學關中屈致長公商確文翰霜晨總轡夜雪挑燈每
顧英標何嘗不眷而況手揣蘭莠目檢金沙如鳳儀之
冥會八音辟雕雲之自成五色鑑別品題纖毫不爽遂
使鈍眼生光爭明秋月拙工操斧誇得鄧林益友為功
夫寧淺眇獨恨秦中風土涼薄清虛日來繁費橫生奚
囊垂盡見河之乾而望井之溢勢固不能力亦有限用
是周旋兩載空持寸心舉鴻毛以報泰山操榆莢以酬
和璧自知菲褻慚負良多夙忝素懷或能鑒宥客秋遠
頌翰教兼示鴻篇寫心血於巴牋繪舌蓮於紈扇直令
道和齡石不得專尺牘之名靈運延年自貶為五言之
輔不有深情烏能爾爾吟研歎服敬拜下風矣復承遠
念飢渴別惠珍新釀九英以為膏丸全鹿以為藥梅含
清味鹿取和鳴二物遠投周行斯寄豈惟適口實足銘
心敬謝敬謝伏念先生以前輩之君宗為後生之模楷

謝情天閣寄跡雲和聳孤秀於霜嗒發清暉於日觀花
扶小閣草護長堤策杖提壺疏泉蒔藥鶯穿新柳以翻
歌燕認舊巢而坐語對景清吟機忘骨換何必計干支
看齒髮哉其學荒藝苑志隔情塗落拓一官陸沉廿載
夢松楸而灑淚言菽水而摧心萬里翔迴長貧如故半
生鞅掌少賤依然不見許於俗人求自安於愚分倘於
此歲獲免愆尤必解組捐簪栖貧待老還其風素慮岫
遠以烟迷故推懷而預訂

與王藻如

憶自分携至今殆將數載悵望南雲同於葭露先生體
自名門官亦仙品今日玉堂人物非不雲靄烟霏風流
翻郁然而僕射青箱太保家法繩繩遞嬗者先生而外
指不多屈昔沈少傅有云吾少好百家之言身為四代
之史自開闢以來未有名位蟬聯文才相繼如王氏之
盛者以是知雙丁二陸未足詡人也某質凡才陋跼踖
霄淵蟻大一官負郭二頃分非烏衣之遊敢方馬冀之
巷乃承高華不棄遂委禽焉俯仰踟躕無乃非匹茲蒙
賢兄敦諭令姪遠來旅署蕭條草草成禮凡諸簡陋統
冀汪涵

又

江浙文才工力悉敵舊章以陪京故獨開使院不及浙
也我 皇上從文連起見爰咨在廷於文學侍從之中

葉忠節公遺稿卷四
公舉才行優異者而首推先生 天子知人善任中外
艷傳不特大科得人將在此舉而先生操昌黎廬陵之
才識唯曾鑄顏使錢唐上下萬九百里風行草偃壁壘
一新進賢受上賞所以繼文肅公相業者千載一時也
忝附葭莩分榮是幸憶往歲嘉平追陪清讌觴政縱橫
笑語芬郁曾幾何時兩更歲籥緬尋良晤知不易得耳

與任梁河

去年除夕接讀手教注存獎借厚意溫詞流溢毫素知
愛如長兄者幾人哉盛暑炎歊惟冀珍攝西陲之苦日
甚一日此行蕭瑟之况言之可羞今兩試告竣一切冊
籍依限齎投幸年長兄告語同事稍寬文法勿過推求
弟性本木強兼無丹術浮沉廿載望實兩虛榮利之懷
掃除淨盡若圖作美官則前此之罣誤可辨比來之曠
典不辭矣所望霄漢故人憐其孤露憫其固窮俾獲以
全人歸老菰羹麥飯上侍老親月竹風蘿次開鬱抱倘
邀祖父之庇豚犬長大授以一鋤力田逢年得免凍餒
於願已足了無所牽誓不向此中作生活也弟才質雖
凡志尚不下作此語者夫豈矯情自知時命難強奔竟
無益耳高明以爲然否

葉忠節公遺稿卷四

葉忠節公遺稿卷五 文類

男芳輯錄

與王子厚

拜別以來遲至三載素心淳德洽膜填膺然而依關塞
 之月光望掖垣之梧影注瞻徒切問訊末由踈節之愆
 其何能贖伏惟先生摘星漢於詩文挺松霜於諫草聯
 端鳳羽士望龍門此誠天下所逃聽而共欽豈直鄙人
 所親炙而私慕也弟才凡命舛履此殘疆萬里輪蹄三
 年荼蓼人非子敬徒老青氈地則扶風堪羞絳帳張空
 拳以搏虎舉枯吻以餐風非身嘗者不知此苦非目擊
 者亦勿信此言也猶幸兩主司先生戾止校士量如玉



尺察及秋毫選衆拔尤若合符節雖隕越之罪或免人
言而齒牙之芬猶望吾黨不識先生能遙鑒而俯憫之
否

與陳廣陵

一月中信使至再年來書問未有如此之數也開閱追
摹神顏俱展然而孤吟淺酌觸緒增懷極望長川書不
盡意想兩心如月同此虧盈耳南土炎歊童時所習乃
濕風苦霧着體淪肌宛在瘴鄉大不可忍吾兄釋俗澄
思蘊清納馥當無是苦也年齒類函一冊錄奉此出幕
客奚囊沿譌獵腐殊不足觀正當以急就篇目之弟所
輯史鑰一編麤耗心力緣多間輟至今未成成時得賜
巨觀刪刊定本欲仰借高名附傳不朽亮勿棄也秋中
得暇敢訂湖心秋月以為盟主何如

復曾羽皇

兩世託通家之雅數齡辱有造之褒此不第孔李關情
而實與沈何同契用是每臨研席便憶舊聞或踐冰霜
永懷碩果文章知己何容暫忘乃一行作吏廿載違鄉
夢中泣已拱之松楸望裏媿必恭之桑梓驅馳牛馬踟
躑霄淵客冬苦搜貧橐奉安先靈復承先生敦念故人
遠來會葬顧在樽之絮酒同入夢之素車緬此古風增
其愴感比來多病報謝尚稽正欲齋藁踵門搏顙頌德
而忽接來函獲聞近履三煩題鳳已恨緣慳纔擬登龍

又知疾作天厄吾輩何甚酷耶及諦觀哀痛之手書不覺沉吟而腸結欲飛莫奮覲面為難然曾竊窺德體自其道腴年高雖偶違和仁者固宜多壽勉進芝石弗厯憂思微資少助刀圭幸勿訝其輜簡先此專人馳候尚容面領教言

與張素存

往在關中叢勞集怨是處乖違所深知痛惜送抱推襟者先生一人耳夫直道古情世不恒有而某獨躬遇之得一已足不憾其少惟仰眺台垣旦調商鼎使文章事業輝赫古今吾道廓如朝野咸泰某素族孤根忝與榮伍然才藝無當於時褊狹不容於俗故匿隱窮村樵貧待老倘不即填溝壑獲奉色笑於午橋綠野之間爾時快幸當倍昔年也側聞先生特荷主知專領史局綜三百年之政刑人物而是非進退之將必麟遷轍固成一家之言傳萬世之信稽古之榮孰大於是豈淺識豎儒所敢置喙乃偶閱婁東王文肅公請儲瀝疏見其持論甚正立心甚苦好事者不察以神宗三王並封之中旨歸咎於積誠幾諫之老臣是可忍也孰不可忍竊觀當日建儲遲難神宗之意未必無屬特顧清議而不敢為耳緩之則漸寤急之則變生情勢然也且父子之間人所難言以畱侯之智而假手於四皓千秋之忠而托言於白頭老翁賈文威之思劉景升袁本初父子語如

謔而太子遂定以是知大臣立言自有深意必若賣直
貪功之徒奮其筆舌與人主抗是以國本為孤注也故
文肅秉心愈堅措詞愈婉調護於密勿之中收效於歸
田之後驛馳手勅傳慰元臣其心事亦大白矣今觀葉
文忠夏考功之紀述本末甚具先生澄懷卓識必能破
羣疑標獨斷如陽秋袞鉞非他人能贊一詞而其不揣
闇劣敢效區區者蓋以有明中晚朋黨滿朝操馭儉之
術飾君子之言者不可以數計即如先君一生清慎孤
立門戶之外見忌羣小構局深文幾致不測雖後即昭
雪而宵人發難之章廠衛羅織之語俱非實錄今按檢
廢篋遺稿繕寫將成容即馳獻先君名位遠遜文肅而
謔詠之冤頗亦相等惟大君子博覽細按指示筆筆諸
公暴白而表揚之列為傳贊不第兩姓忠魂銜恩壚壤
而幸吾朝有信史為萬世存公道功垂不朽慶流子孫
某某等泣感高厚世世以之矣北望五雲臨楮九頓

又

某百叩啓言先君自縣令起家游歷中外積叙勞資獲
遷憲副因凜持風紀孤立門戶之外郊辰間為宵小所
構幾致不測幸得昭雪此時彈章口供俱出仇家廝養
之口並無實蹟可據先君抱恨入泉無從辨理某為人
子每切痛心今幸先生以遷固之筆秉袞鉞之權直道
在人沉寃可白故敢摭拾從前被論及事後申理章奏

并行述墓誌三冊封投記室伏乞先生全閱來章重開
寃魄使持法守正之孤臣不爲羣小所汙蟻勒成信史
垂之無窮不獨某家世世子孫力圖犬馬先君骨肉雖
朽亦銜結於九原也臨啟哀怨泣血之至

與李梅崖

酉春令兄到秦接讀韋箋五雲縹緲隨附短札佐以寸
芹非敢云報聊誌勿諼耳弟自歸卧荒村窮愁萬狀不
出門一步不接對一人故草野姓氏無由上達非落落
有遐心也側聞先生吏治文懷歲高月富據奇險之區
得山水之助此宦途真樂欣羨無已蕪詞四章伏祈省
覽惠教邱遲不敵王令今昔同慨幸勿失笑臨毫神往

未盡願言

又

昨在家鄉聞先生政學兩優不以新資替乃幽賞此種
風致當於古人中求之故前寄短章頗及一二適接翰
貺即此一卷冰雪之文重於珠貝而復飲以醇醪寧謂
此粲粲者不足君所乎惟有愧謝耳和章率就因來人
行迫裝潢未成稍遲就正外諭合刻之舉誠所樂聞但
珠玉在前小巫氣索今附到拙刻數紙不審此式有合
台指否其詳悉之

又

鄙性迂愚落落寡合歷數生平友誼親情如先生者百

未一遇也乃睽違四月夢寐之中如在芙蓉亭畔飲嘯
聯吟及鐘動攬衣而夢境亦不可得真堪腸斷但臬席
兩虛捷者先得雖雅人高致無動於中而關切如弟不
無悵惘耳目下推陳致新諒必契合幸一示之弟於仲
春到楚公私應酬日無寧晷無論行笈殘編塵封盈寸
即欲作家郵而停筆數四以知同為外吏又別仙凡矣

復顏翼超

昨歲春初讀賜復之札寫別緒於八行慰離情於千里
高誼堪銘雅懷難繪弟自審無狀不知何以得此於先
生也昔青蓮登郭帥之堂少陵入嚴公之幕非作叅軍
實為揖客以視先生真能遠匹別來南轅北轍委頓風
塵回念知己銜杯披襟忤憤此興了不復得鬱結之思
時填胸臆捧讀大教過蒙獎借自揣吳下書生有愧文
家宗匠雖欲力挽秦風歸諸正始而枯腸鈍吻未盡挽
回他山一集適足供人覆瓿耳至於拙藝數篇不過乘
興偶拈藉以消遣就正大方尚有餘愧弟三年萍梗秩
滿將歸雖及瓜期尚爾匏繫蕭瑟之狀不堪縷述久辱
知己之感未得遣走奉謝殊多踈節歉仄之私非言可
喻西望姑臧不勝神往

與成仲謙

雅人深致東晉西京密坐張燈南蔬北酒欣四美之既
具何三爵之足辭於是聆梁魏之音色授魂與展鍾王

之卷心慕手追客既醉而忘歸主多情而卜夜屏風六
曲心裏玲瓏獸炭三更鼻端煖活亭亭珍卉學月影以
俱圓裊裊名香襟花枝而並郁遂使弘微失餽白隋舖
糟北海停樽東山撒妓邊生忘花木之譜桓家艤書畫
之船固知調鼎自有家傳名客不無良法也酒未及醒
書以言謝

與王瑁湖

歲月馳飛津塗綿亘時地所限踈曠實多自奉函書又
更涼暑跼懷結想言距能宣先生啓沃講筵編摩史局
操千秋之袞鉞成一代之文章將把遷固之袂而奪其
重席矣何時一讀宏篇以飽儉腹望之望之某駕足屯
塗茹荼集蓼惟知奉職違忍謀身獨幸許汪兩先生鑒
拔精嚴甄收暗合得士甚盛秦風改觀差足自慰耳

與王儼齋

三年契濶馳慕爲勞昨歲人歸開函心寫比來又更涼
燠結想未抒踈曠之愆惟望以地僻矜宥之耳先生剽
纓天閣論道御筵不獨文義芬華仰成君德而闢邪扶
正功在聖賢昔昌黎推尊孟氏謂其距楊墨正人心功
不在禹下以今方古夫豈眇儔封事遠騰大可爲儒冠
生色也

復陳六謙

都門一晤瞬息十年使命所麾東西其轍初不知荒疆

冷署密邇花封也足下華胄名流低眉作尉才人借徑
自古爲多望中條之雲酌白隋之酒興酣岍憤句就揮
毫料姑射神人許爲知己況異才挺出遷擢在指顧間
乎忽承垂念賁示尺書以姻戚之關情辱瓊瑤之下逮
垂注若此媿感何如弟性本迂踈命尤乖蹇龜勉三載
望實兩虛難酬密戚之相期益切寸懷之慙負明春行
李由豫南歸未獲登司隸之門下使君之榻興言及此
悵惘奚窮

復張樺恭

東川南邁筠菴北還文酒笑談雲流波逝猶冀復見先
生一清心目而鶴羽回翻鸞音岑閭悵岫遠以誰來思
美人而不見乃繹賓筵之馨歎玩毫素之風流愴悅於
中低回欲夢始知研席之交足移余情也日遠惠瓊章
中瑩外潤篆刻之妙目所未經把玩甫終作答陳謝而
銀鹿跋跋追不及復非敢妄自簡倨惟鑒諒之畫家三
品氣韻爲神超凡爲妙諦觀佳製二者兼之昔范仲立
遊秦得山之骨法董北苑多畫江南山水幽情婉思意
外筆前先生手握華蓮目空江水宜乎吮毫落紙無際
可尋耳雖儉荒不知至理而寶此墨香重於拱璧矣弟
落落孤根非荼伊蘗視文章如性命以貧病爲固然雖
癖好如斯亦奉職應爾比聞貴鄉顯要謂弟論文太苛
執持過峻此誠求備之辭抑亦中病之藥倘若早聞不

若是憊矣先生知我聊一及之

與蔡鷓揚

憶壬子春初接對於梁公呂齋頭此後弟兩入秦關一
至豫章車馬勞勞奄忽十載側聞先生養重東山而弟
亦倦飛棲息帶水盈盈尚慳良晤回念昔年先師相與
先大夫契濶夷險推素抒襟金石非喻未嘗不流緬風
流潛然淚下也今先生振翮鳳池竚開黃閣繩繩濟美
榮慰何如謹白者先兄予聞舊榻高齋曾忝硯席及先
生冠領羣彥承寵綸扉長安簪笏榮先生之遇者每念
先兄疇昔之交借采分輝已有年所今溘然遐逝悲動
藝林舍姪等長貧守賤無藉顯揚欲懇鴻章以光泉壤
然雖叨世講未登龍門轉浼寸羽先容賚狀拜懇先生
古道敦摯當必有以慰之并祈惠示片稿使草廬襄牖
窺竊容光尤切感佩臨毫馳戀未盡願言

與莊天申

西堂清讌重費主人乘夜解維恐煩投轄然竟欠登墀
一謝禮法之士當不若此愧負何如別後日嬰塵俗無
計自免渴望文旆東來周旋談笑滌此煩襟不審吾長
兄能惠然否也冬間經營先君墓事例有誌銘自愧迂
拙清貧不敢攀緣顯達惟存翁唐先生與先君道義相
期積有年所尊齒論交似宜乃爾已決計懇之矣又念
存翁高年養靜無暇構思若假手捉刀諒無佳製前在

高齋得見日干先生所著逼類先秦衙官兩漢先君立
身大槩得日翁之文而傳則弟可無愧爲人子而晨夕
永言未敢啓齒者以求日翁自爲文則可求日翁代存
翁爲文則不可也故與舍姪細商幸託肺腑之愛倘日
翁推長兄相成之意俯鑒寸丹嘉與微願亦忠厚長者
所未必靳輒令舍姪親造叩祈代懇伏惟留意又前日
翁手教指示詩學折服感佩非可言喻原擬肅函謝復
因所懇之事鹵莽非分恐干誚讓故未敢通名如蒙慨
允另容躬拜几席也薄贄些微用當羔鴈并乞鼎致冒
昧竄陳統希鑒宥尚容專謝罄瀝積懷

與陳亮工

舊戚新姻纏綿終始懷兼幽夢見即開顏慨念素交金
石匪喻足下曠度逸情內醇外朗兩方一阮競秀聯葩
對亦分榮別有餘慕但初造高墀雨露華譙鄰於放誕
竊用慚惶不止爲口腹言謝也秋暑漸退涼月欲圓擬
專柬屈駕再聆塵談

與王印周

夫崇臺經始材亟梗楠大樂待調器資金石然其初蟠
根空谷藏耀虛川雨露強其榦冰雪試其貞清湍媚其
姿泥沙黯其色歷乎顯晦益千百年用之廟廊將億萬
世故觀雲構者嘉棟梁聽箭韶者歎美善而不知其才
與器久養故鬱久鬱乃舒也伏惟某官人門並高資業

兩茂早釋巾褐慨布經綸然而仕不擇官官不擇地可
內可外亦劇亦閒曠廿餘載之遲分陝以東之任朝寄
既深士望攸屬愚者羨其榮識者嗟其晚矣比從遠邇
逖聽風猷知某某下車以來春日秋霜涼暄應序約已
豐國華質從宜將移風以嚮道竚懋賞以報成天地廓
如吾道良泰又竊念 皇朝迄今鄉達雲起簪紱爛然
而節鉞猶少閣下今與某翁先後授麾連疆開府飲河
洛者知與汶濟同源登泰山者咸謂嵩高維嶽豈直桑
梓之慶夫亦史冊之輝某質凡運舛於役關中度隴行
邊所如堪慟聞笳見雁是處生愁悵望親知如在霄漢
今倦羽投林栖貧待老鍵戶不出業已半年專此寸函
仰候鈴閣伏祈垂鑒

復唐子恪

日承冒雨東來心目俱爽雖周旋信宿而荒村雞黍盤
格麓踈深慚地主但不審玄裳縞衣者頗翩翩然入夢
否也

又

昨在關中與陸王兄昕夕晤對語及足下品誼清醇文
酒雄暢懸揣志趣妄謂同符夢觸神馳情非一緒如聞
西子之名者雖未識其貌而愛慕隨之矣夏間旋里親
串填咽塵務猥繁願見有懷登龍未果日從婁東迴楫
知足下不棄庸俗遠渡申江翩然而來悵然而返使鄂

州有訪戴之棹席門得題鳳之賓且計往返相違不越
一舖而覲面失之豈天忌石交慳我良晤或故艱今日
之遇堅異日之好乎乃至閒緘展篋暢詠新篇墨挾蘭
香字翡孔翠纏綿惠好情溢於詞第何人斯膺此殊獎
旁皇慨惜不知措裁今偶入郡城過詢敬老知足下命
駕玉峰而弟又抱疴東渡晤期當在春仲矣率泐奉謝
酬什續當呈教臨毫惘然

復閻康侯師

某不敏髫年蒙特達之知昨歲承恩羈棲燕邸每當風
雨之夕回念文章知己如老夫子真令人感而欲泣也
自愧國士深恩報稱無地即修素書遣一价輕三千里
而致之左右不謂轍跡靡定浮沉石城以致踈失開罪
撫心滋愧耳遙頌台札長跪開緘捧讀之餘泣數行下
嗟嗟以是才品而淪落不偶不肖輩尚何言哉客冬先
君大故風木之悲千古同憾臘月抵舍經營襄事心血
爲枯兼之奇荒異窘上迫追呼私衡子母貧病之態途
之人亦能道之安得不向成我者告乎幸夫子不吝珠
玉教之一言使不肖得進尺寸之階圖報異日庶勿負
數年來提命盛心耳或能遺冗把盞論心則從前光景
恍如一日也

與邑令陳某

邇者國課之功令綦嚴役務斷難刻緩草莽遙度惟有

修國一法可以速成而無妨目前之徵比今老父母已
先得之利國便民兼舉並善可勝慶幸從來大審在立
良法提充貴合人情一亩之中業戶之貧富異田畝之
多寡異當事豈能家至而戶詢之勢不得不假手於胥
書而取裁於公正然書正非愚民所樂任也地方之桀
驁利口任焉富者田廣賄則縱之貧者田少懦則及之
此賣富差貧之一大弊也又如各亩之田不必盡爲本
亩人之產客亩人亦或有之非擇土著殷戶承充催辦
其不爲免脫者寡矣乃書正徇戚里之私庇土著而役
客戶主客之情枘鑿不入賠累之苦膏血俱枯在民則
竭蹶無濟在官則呼應不靈此賣近差遠之一大弊也
人如各亩業戶家有消長田有去畱或勉充前役而力
不繼或田已別售而名尚存書正所熟知也力不繼者
與爲休息別售者與爲更定亦書正所易爲力也乃利
其消長去畱之不同緣以爲奸窮民手足無措此罔上
行私之一大弊也釐弊則利興利興則課足從古興利
之方即在除弊之內誠能盡祛前弊一意澄清如理亂
絲解其結轆緒不引而自出矣如疏流泉決其壅滯水
不導而自行矣況老父母以宏濟之才理彈丸之邑總
大要於上而吏書胥正承流於下直咄嗟立辦耳

與信豐令劉某

戎馬生郊羽書旁午弟雖忝聞曹無與民社然樽前撫

劍紙上論兵氣亦勃勃況足下之身膺重寄者乎貴治
壤錯粵雄西南門戶馭兵撫民要在誠信此不特傳家
方畧而足下大才已優為之前以人心風鶴念及大閤
僑居專人一候動定此知交常理乃蒙手札慰注懃懇
滋我愧矣弟承期已及路梗繫匏寂寂空齋無人可語
因思先令公若在移燈促膝聚米畫灰必不以書生見
外今故人已往風景頓殊肝膽向誰笑啼不敢撫今追
昔愴感何如

復某官許某

日者閣下秉鉞徂征某抱恙杜門不獲引轡遠送悵何
如之昨聞捷音虔城內外白叟黃童歡聲動地咸頌閣
下身先士卒之功出百萬生靈於湯火之內及接手教
知摧鋒破敵克復全城若疾風之振槁高屋之建瓴也
何神速如是乎某愁鬱半年一聞此捷慶幸敬愛之懷
有心可喻有口莫宣遙想軍威遠播小醜披靡計日可
待而某忝辱至愛敢進芻蕘蓋謂逆賊連踞三城固守
吾兵鉅萬莫敢誰何而閣下不辭勞瘁不計功賞踴躍
爭先操必勝之具出萬全之謀首建膚功材略無兩宜
急乘此時分兵守險速下秦和長驅以聯張家渡首尾
之形順流以成螺子山犄角之勢則連復大城合圍吉
郡省來大兵勇氣自倍彼賊孤城援絕非死則降不特
開虔州之門戶而並導進廣之咽喉銘鐘垂帛誰與爭

功語云兵貴神速又曰大夫出疆有利國家安社稷者
專之可也豈必稟命數百里外以奉命承教為恭耶若
云軍事至大持重為先試問半年有餘不加一矢深得
持重之要着者功效為何如哉某書生不宜侈口軍旅
然閱古今用兵行師之道多矣形勢利便如出一揆諒
無他策也惟高明裁之

與蔣晉侯

長安冠蓋方殊性別知心無幾間有一二升沉聚散恍
惚不常離亭一尊草草別去或通聞問或聞問不復通
者獨弟與長兄相知最深周旋最久乃一旦分携遂已
半載引領青原憶舊遊而懷舊友不自知離魂之黯然
欲銷也計榮任當在暮春地雖衝瘠而以長兄長才遠
馭三月已可其以平定安集使鋒鏑子遺忘其昔日之
慘酷長兄優為之不徒以出境之虎隨車之雨誇耀史
冊耳弟棲遲冷署况味可知幸叨遠庇體頗平善春間
薦辟曠典諸老推轂甚殷弟自愧無文而又家貧親老
博深源一日之虛名畱仰事俯育之遺憾毅然力辭不
忍以彼易此往復遜讓幸脫網羅蓋十洲蓬島原非凡
俗所宜居人間烟火與我有緣不合退避年長兄開函
目竟當必拍案狂叫亟稱此子襟期高人一頭地也然
否然否

葉忠節公遺稿卷五

葉忠節公遺稿卷六 文類

男考輯錄

復顧介石啓

辭賦西京典型南國九經學富五雲之姓氏猶香三異
 政聞百粵之棠陰尚茂快讀驚人詩句落雁峰高欣看
 命世珪璋藍田玉暖榮分桑梓慶洽葭莩某幼非了了
 長更庸庸初筮仕而得蹇屯鉛刀易試為讀書而失溫
 飽微祿堪羞自謂淹滯寒僚不若沉淪終老而以功令
 所迫因之拜別未遑遙頌雙鯉之緘言皆玉屑過損百
 朋之惠情甚綈袍乃猶念切薦蘿復枉烏衣之駕甚且
 心關雲樹再投白雪之章葢送遠情多原不識桃花潭

深淺幾許而臨岐話促應莫問楊柳條長短如何憾會
晤之尚遙愧瓊瑤之未報茲者關河千里御李無由而
況京洛孤踪薦雄誰是黃金臺畔孰思有用之才碣石
宮前不長無根之草蛩吟敗壁月冷虛窗鳥亂停雲鐘
催殘夢時而牀頭金盡飄零季子之裘時而客館尊孤
冷落青蓮之酒晨夕何堪晦明益甚兼之新絲新穀縱
十雨五風尚煩吏議况乎不耕不織雖四目两口何暇
謀身萍梗北浮心旌南掛伏祈春溫一語厦庇萬間分
燠噓寒免洒窮途之淚引繩切墨得披明月之光則故
人之私從之少慰而長者之德戴以不忘矣

上白巡撫啓

葉茂夔龍名高燕許關中輓粟舊傳蕭相之豐功城下
焚香再見曹彬之偉畧任兼將相卓乎輕裘緩帶之風
地控粵閩展也尊俎折衝之烈焰銷南服潤滿三江恩
溢西陲碑懸五嶺已見壯猷之曠世行看寵命之自天
某才難勝任拙且守株昔隸版曹慚菽麥之不辨今司
儀部愧禮樂之未遑茲承乏權關獲覲清光於咫尺幸
叨舊屬敢託厦庇於萬間伏祈俯鑒愚庸曲賜提命獲
沾造就之德即同高厚之恩矣道遠濡滯稍稽晉謁心
深瞻戀先布微忱

賀李副使啓

龍章日麗恩深銀漢之波鳳羽朝陽彩映碧梧之色讀

循吏傳祇知增秩賜金際全盛時堪羨析圭儋爵星輝
兩郡潤洽三江恭惟秀毓金城名傳玉樹朱輪帶雨全
銷嶺外烽烟白鹿銜花共識閣中芝草政成橫浦珠還
合浦之濱亭愛綠陰錢送山陰之叟蓋惟才經百鍊明
揚之典不虛而况詔出九重側席之思乃慰當年鷺冕
近綰雙符舊日龍門新施三戟某等欣瞻燕幕遂阻鳧
趨牙節建而干雲歡聲動地隼旗開而就日爽氣橫秋
折嶺上之梅花青陽南指騎街頭之竹馬紫氣東來薄
貢蕪緘敢云作頌兼攄葵悃以等獻芹

復李 啟

龍門品藻供奉風流郡重股肱黼座寄金湯之任屏標
姓氏江城回黍谷之春宣德惟二已舉帷而露冕治平
第一行增秩而賜金曉曙雙龍八思執御薰風五馬士
慶登仙某才愧蘭絲學羞蠡測明前望氣莫陪明月於
庾樓江畔持籌幸接清暉於晏府方乘槎之無便徒瞻
斗之有懷乃珠玉紛霏先施忽青更雲霞燦爛嘉貺遠
頒何德以承璧惟慙於藉手附言稱謝感已切於銘心
莫罄塵悰祇希霽照

謝江右董制府啟

秉鈞分陝世傳元老之勲名仗鉞專征代仰令公之威
望五百年而生名世川嶽鍾靈廿一歲而位通侯風雲
適會師中錫命 聖天子為地擇人樹下論功大名臣

匪躬報主三江波靜五嶺烟銷朝野懽騰軍民慶洽恭
惟中朝柱石奕葉簪纓維翰維屏展也一十三年方岳
允文允武果然二十四考中書貫日橫霜陶威公之忠
義輕裘緩帶羊叔子之風流不效晉人歎傲庾樓之月
佇看漢相丹青麟閣之圖某智窮韜畧才拙典墳謬忝
權關幸託萬間之庇過蒙垂盼獲邀一顧之榮自揣葑
菲樗櫟之材奚堪栽植乃蒙飲食教誨之德曲賜優容
識韓之願已酬御李之思益切伏冀出賡常武入佐太
平從此閩粵滇黔人人衽席行見桑麻燕雀處處生成
則畢散不足誇而臯夔端再覲矣

賀董制府中秋啓

霓裳夜奏初分月殿之香仙掌雲明普湛金莖之露九
秋方下千里同風一鏡新圓雙江如練恭惟胸懷霽月
品擬秋陽旣手答而口酬不效元規清談達旦乃文經
而武緯重逢吉甫爲憲萬邦仰皓魄之清輝應上千秋
金鑑溯銀河於碧落如看一片冰心將使嶺嶠烽銷駐
夜光於不夜行見湖湘浪靜留清影以長清朝端賴玉
燭之譔黼座佇金甌之卜某光如燭火明比囊螢霧雨
常昏幸竊容光之照樓臺近水自誇得月之光緣羈職
守於抱關難隨鴈羽謹對筐篚而泥首薄貢葵忱幸鑒
微誠俯垂賜納

賀黃驛鹽監司中秋啓

江夏高名温陵巨閼花飛驛路皇華無雨雪之詩霜滿
牢盆軍國仰魚鹽之利循良旣最陳豫章已拜新綸邊
境日寧寇穎川仍留本郡智珠日握如看一鏡常圓朗
月入懷况是九秋方半某明如一隙照竊未光愧非益
部使星移來天上幸覩堯年卿月常照人間雖有屋梁
之思其如帶水之阻肅函魚素蒸致芹誠不盡鄙懷統
希崇照

賀李按察司中秋啓

九秋方半天風吹桂子之香一
新圓仙侶按霓裳之
曲豸冠玉律清映冰心柏署雷
氣秉金令三尺與朱

弦比直雙江偕碧漢同清恭惟 苑文章太邱德望司

隸而爲廷尉龍門即是于門王樹而繼靈椿謝氏不殊
竇氏引經而斷獨持天下之平得情則矜必求死中之
活允矣中天卿月誠哉一路福星某照之藜燈明如燭
火雖非文舉謬託通家私幸慈明舊曾執御邇者旌麾
咫尺私欣得月之光乃以帶水阻修尤切瞻雲之想肅
將雁羽愧童子之無知潔貢溪毛幸長者之弗拒統希
霽照無任冰兢

賀邵學使中秋啟

使星遙蒞璣衡開東壁之輝卿月初圓珙珥映西江之
色擬秋陽之皞皞至德可師看冰鑑之熒熒容光必照
題標明水墨帶天香心在玉壺星躔斗宿恭惟文章華

國理學名家滴露研朱註就堯夫之易上書諫獵草成
司馬之文銀管兔毫新翻出畏吾奇字金蓮歸院晚披
來蜀襪宮袍乃操筆削之權曰是曰非皇史宬班班不
朽復受輓輸之任餘三餘九太倉粟陳陳相因用是世
號通才朝稱國器遂振尼山之鐸路遠匡廬旋乘采石
之檣帆移章貢借霓裳於天上如聞馬帳笙歌折桂子
於月中不羨狄門桃李而況豫章才藪作滕王閣序定
有奇文抑且甌越名區觀徐子亭碑必多佳士八代仰
昌黎之望一時羨元禮之門某文愧夜光識非月旦登
第早年同座主武接班行含香三載共郎官頭低簿領
慨自明光殿裏不畱視草之人猶幸安樂窩中得拂談
經之塵春風揚柳喜隨青翰之舟秋雨梧桐罕接紫芝
之宇望江東而惆悵雲樹空懷經額上而踟躕梅花難
寄茲藉因風之羽敬陳落月之思惟願文盡連珠士皆
照乘不遺駿骨目空駮駟之羣自有藥籠收盡蟾蜍之
窟則文明以貴化成歸壽考之君追琢其章樂育慰思
皇之士矣

荅謝際斯四兄祝壽啓

才真國器秀毓家珍當士衡入洛之年賦高雲瑞乃天
聖傳臚之日袍惹天香對仗讀彈文世頌朝陽之鳳避
人焚諫草獨吟左掖之詩茲雖九府借才暫輓鄴侯之
粟行見八騶前導旋登高密之車棗萼分榮荆花生色

弟生也庸庸幼非了了憶自髫齡就傅慚六甲之未通
弱冠登朝愧一籌之莫展十年荏苒駒隙頻移七尺昂
藏馬齒加長幸假郎官之節獲聆伯氏之墳而又水隔
雙江望鵝原以千里因之雲深五嶺如鴈序以同飛况
昨日登高未續子安之韻乃今朝烹鯉忽來康樂之詩
蒙注念乎賤辰已過三十而未立益感深於同氣恐逾
四載而無聞長跪開緘撫躬茲愧祇登字爵用誌恩施

候山西謝學使啓

秀毓蘭除名高栢署烏衣揮塵首開江左之風流繡斧
乘驄獨振朝陽之神采建牙三晉四牡雲蕃輓粟五原
六軍宿飽天子乃嘉成績畀以薪樵思皇待以持衡
比之水鏡憶昔班心對仗三臺諫草紙貴中都即今絳
帳掄才八代文章口空一世沐已沾之化雨合坐春溫
撫待叩之洪鐘高題月旦微特士林之幸實惟邦家之
光弟竊慕丹鉛未操衡尺憶衰哀京雒得御李君者有
年乃荏苒風塵不見叔度者許久念枌榆之舊好十載
離思望姑射之神人五雲縹緲而况古晉表裏山河人
材淵藪自版巖夢卜代傳傳相之鹽梅及桐葉戲封俗
尚叔虞之禮樂茲當執經問難之日用弘起衰救弊之
風奎宿重光千里絃歌自韵山谿頓闢公門桃李爭榮

復武功陳令啟

鄂渚名流樊山雅望紹太邱四長之烈績最關中坐元

龍百尺之樓日空江表暫借楚材而秦用頌三輔之神
明行看鳳噓以鸞騫沐九重之雨露遙企琴堂不勝雀
躍弟自慙寡陋猥奉簡書欲借大方之冰鑑藉手得人
不謂金玉之遐音未遑就正初朝撤棘深冀一識荊州
後欲踵門聞已言旋花縣方憾交臂而失之何乃烹魚
而如遘函詞繾綣益深仰止之思式既殷隆更切負芒
之媿

候甘肅華撫軍啓

帶礪元勲鹽梅碩輔經文緯武全秦沐雨露之恩樽俎
折衝分陝大屏藩之績旗懸秋月風清如水之門座繞
春雲律轉回陽之谷矻作中朝柱石紫到函關全銷塞
上烽烟青歸隴樹久矣帝心之簡在行看寵眷之自天
某吳趨末學冷署微班猥奉簡書擬賦自慚於明水謬
操管見觀風幸審夫夏聲鑰闈半月方緡校之未遑撤
棘以來亦應酬之罔暇仰瞻祭戟千里而遙欲聆塵談
寸心如織雖識韓無路悵公孫之閣道里阻修而御李
有懷望崆峒之山景行彌切不獲躬陳其欵曲寧敢自
外於門牆望風九頓肅泐八行

上余大中丞啓

蓋聞抱松栢之心者亭亭直上志鷹鷂之擊者落落無
徒故漢儀特設三臺唐制專領六察惟盧奕之清節三
世其官必傳咸之方嚴獨專此座誠天下想其風采斯

憲紀藉以激揚恭惟言蔚道華行端吏表指朝章於掌上明辨秋毫持政體於牒中暄逾冬日曉看烏署心軫哀鴻夕整豸冠聲同鳴鳳維龍袞之是補將犧鼎之待調某素族孤根短才瘠福積勞資而得賁卦舉駑足而涉屯塗始則新穀新絲遂煩吏議今且呼牛呼馬猶畏人言振羸骨以冒風霜黯兮三年苦行剖心血而矢天日蕭然萬里空囊雖吾老甘貧著官箴以自勗乃臣飢欲死作客難以誰憐嗟乎蚤達奚裨浮生常省固窮不濫心逸日休若使圖作美官便與昔年實錄之選或欲倖邀曠典不辭近來博學之科先生素知迂癖當不訝為矯情也

上黃太宰啓

六大首崇冢宰綜領六卿九官咸隸端揆銓衡九品持鈞秉鑑賓筵祇風月之談離渭分涇都省屬衣冠之目故黜陟幽明之寄必清通簡要之人式鑒前謨三銓獨重於維元老千古間生恭惟玉鉉以節金鏡同清高吐握之風才不遺乎管庫審通塞之路品必副其人門體聖天子立賢無方之心得古大臣以人事君之義用是朝頌纁帛吏捧蒲輪起安石於東山蒼生待命還城陽於左選天下稱公甄拔標題遠勝山濤之啓區分品藻慎逾季重之箴在昔兵農禮樂之司迴翔六府今作舟楫鹽梅之用指顧三公誠斗南之一人實台端之上

相某質凡才劣宦拙名微世守一經猥登龍虎之榜遲
輸二頃遂奪鳳皇之池分一瓊於石鼓之旁六年教胄
低雙眉於簿領之內十載爲郎自揣庸流祇安愚分力
辭宗伯之薦不就博學之科亡何秩滿當遷一麾西去
裝輕易發萬里孤征兵燹子遺地乏詩書之澤輓輸重
困士無誦讀之工遂使清渭就枯岳蓮失秀雪山逾冷
羌笛徒悲并無首霜以饜先生安得參苓以擬弟子然
而人臣奉職義不謀身多士嚮風文頗近道今年秋兩
主司揆奇拔異如冰鑑之高懸故諸孝廉洗髓伐毛亦
陳言之務去得士可爲獨盛秦風藉以改觀老夫子鑒
閱闡書參觀試牘當必許其斐然不致斥爲迂誕也某
承乏三年凜遵百度守閑踐墨罕通片羽於長安故踈
節畧情未展寸衷於函文茲公事告竣積懷可伸敬熏
素以陳辭冀垂青而賜覽伏願土田早錫名壽日隆百
年之計樹人薦賢受賞九命之加被袞贊拜不名若文
潞公之相四君坐而論道如于新野之爲三老跪而乞
言則黃髮在廷簪笏慶明良之遇赤心可繪丹青生史
冊之光矣

復李天生檢討啓

竊聞孤貞守道富貴逼於時來大孝顯親菽水高於祿
養謝太傅邱壑之樂夫豈放情陳希夷毫楮之投當亦
有意故我韞子佩曾寫冰絃藏羽隱鱗終歸珊瑚網况乎

以空世之學應側席之求而眷戀松雲謝懷軒冕使中朝史局輟鏤管而晤思海內士人睇蒼生而歎息誠獨善矣如時望何恭惟道闡西銘名高東觀兩到之質一覽便通二劉之才五事同舉兼什伯之智手補袞而雕龍綜三五之書學出經而入史用是採紫芝於商洛致文鳳於岐周將使西漢文章遠駕龍門之筆北門學士近分宰相之權乃初入綸扉未分韋纈而載懷子舍終戀萊衣此高人以盡孝爲忠而君子謂雖見如隱行見鋒車之召早趣舍人之裝某愚不適時拙而廢學頑金未鑄知無脫穎之期朽木不雕久絕向榮之望每憶瀛洲艸綠初沾涓滴之恩乃緣海國出荒遂逢鈞檢之使一官落拓魂銷石鼓蟲魚十載浮沉計拙金臺柱玉謬承人之來叅大邦笑孫郎之文何勞旦旦負邊生之腹未必便便兼以癖性徑情難合簪紳之意孤根素族誰借齒牙之芬萬里空囊百道酬接臬神如不速之客窮鬼若應門之童蹇鈍紛然怨尤何益獨是廿年斷梗旣乏買山之資百口歸孥兼無脂轄之具此所以忍淚不敢下仰天而無如何也伏承先生賜之月旦坐我春風初晤梁山竊有同舟之幸夜談蕭署如讀數年之書從此分携遂更歲籥將期欵聚時切心旌不謂詵詵於道旁宛爾欣欣而良覲如置鄭莊之驛冒雨相尋若啓羊欣之關從花自碎居然訪戴不啻迎任賤子何修先生

良苦而又錫以大序冠此拙篇藉高文典冊之表揚爲
後生小子所矜式其利已溥欲謝難名近者公事告成
塊然愁坐念契濶之良久懼鄙吝之復生乃白雪飛來
明月在抱歛然珠玉至五百字之多憑此吹噓將九萬
里而遠榆枋燕雀襲彩鳳之羽毛下廐駑駘被鏤金之
鞍勒雖僉荒未解聲律而癖好甚於珠璣不審何時獲
親蘭臭敢希別指用慰葵心

又

春寒乍解天心漸舒晴雲自飛空翠欲滴此居者以及
時爲樂而行者則對景含悽也在昔趙至將行爲書叙
別王維送遠醜酒傷離挹彼深情江潭猶淺景其高致
華岳爲低而况合志同羣居然千古難聚易散若我兩
人者乎先生學誼已崇情寄故遠挺松貞於絕澗吐蓮
艷於孤峯希心聖賢澹然榮利影纓天閣義不後君晞
髮家山孝以將母真可謂動默無間進退綽乎者矣某
少長海濱聞見寡陋間從師友之末席略窺竹素之遺
文雖源流小殊而思理若契是以石函綠字揭日懸星
玉圃珠川驚心眩目西京賈董掌握靈蛇東漢班張口
摘鞞繡當塗高七子之體金行啓六朝之風唐自開寶
以後不施羈紲並驚雲津宋當南北之交雖有拘牽無
疵雅韻其間才人傑士操筆荷囊或秘省行臺飛馳詔
檄或花時酒夕占屬詩文莫不叩鐘石羅蟲魚抽靈思

振芳響極一時之美垂千秋之觀彬彬乎郁郁乎於斯
爲盛茂以加茲用是移情前載跂足時賢四十年來庶
幾旦暮而名不出於一里足未徧於九州傾蓋良難盍
簪奚望吟孤易倦抱恨空天岫遠誰來此生若夢乃不
謂荏苒垂老興竭學荒而始得遇先生也憶自相識以
來迄今三載接論則膝席俱前寄懷則往來如織室遠
人邇形隔意親周旋未終離索伊始遙頌毫素兼惠瑤
華情如弘讓之書詩續文通之賦直使已舒新柳待折
猶顰臨去斑駁欲嘶還咽開絨淚迸讀罷魂銷夫賄勢
俗交尚知惜別文章知己能不關情竊附素心用布衷
曲某從到貴鄉略無善狀堅持冰蘖自致飢寒以官而
貧爲鬼所笑非索醉而典春衣欲脂車而書乞貼情事
至此迂拙可知然愚者所譏君子不責也獨是終南陸
海豈乏名材下里巴人偏嗤郢雪束經書於高閣啜糟
粕於枯腸人同其師師同其教某苦心指授雖愧齊人
而退舍揣摩終移楚傅勉思盡職未喻所懷首路沉吟
以此爲恨先生躬盛名扶絕學視其鄉人不啻子弟開
示易入領悟必多幸鑒微忱曲爲畱意行矣先生請從
此別車馬旣發關河邈然他日荒村陋巷之中獲聞清
廟明堂之作則毫端睂目自足傳神句裏宮商無殊傾
耳白雲在天丹誠在抱臨毫悽咽知復何云

又

蓋聞百川皆洩望海爲歸萬彙各昌徂秋乃實故君子
大受謂鼯鼠之飲河賢者晚成惡槿花之暮萎珠玉善
藏而世寶蛟龍能蟄而用神物理固然吾道可見先生
積行立名嘔心成著腹函經史之液口發騷賦之音服
匿錚釘世稱博物雕龍玉海人誦傳書此王仲寶之所
爲心折而蘇令綽之自謂不如也乃獨澹然榮利厭驚
聲華將欲終焉離垢之園敬謝文林之館高風亮節邈
矣誰儔坐月孤懷遙情莫寄想先生憫其行役或不以
踈懶責之而未造張陸之宅罕接恭緒之顏不坐春風
難邀月旦此中悚仄言詎能宣某闇識短才孤根瘠福
人不稱地命復憎文棲二豎於弱軀填百憂於方寸冷
風萬里兩袖空垂捉月千川三年如夢擬著勞生之論
自悔其愚曰歌歸去之辭已覺其晚而况醫瘡剗肉難
博上下之歡心傾腹叩囊不益生徒之神智咀含荼蓼
跼躄霄淵悵望秋旻徒滋悼歎先生澄觀越俗卓識空
時必能鑒此苦衷故不憚爲知己告也今幸公事粗了
倘邀大庇獲免愆尤便當投老松阿銷音窮谷娛親課
子以懺前非何苦而勞形敝神望實兩喪乎某年來薄
有蕪言分宜就正但處非蔗境哀類蛩鳴竊恐靈鞠之
文見嗤王儉孔昭之賦取誚魏收

上巴撫軍啓

伏聞荆玉在璞必泣血以相明鴻毛遇風乃干霄而直

上故前莫之挽動足登天進有所憑投竿縮地在昔沈
太傅得詩題壁王子知名崔司徒駐馬呼閭高生驟貴
非附青雲之士何來朱紱之榮此古人重有狄公人物
每懷任昉也恭惟肅肅在位休休有容控萬里於掌中
河山生色撫子遺於席上童叟安眠既疾惡以如讐見
楊湛謝游望風解綬更求賢之若渴令王陽貢禹相慶
彈冠凡我庶僚罔不畏愛顧惟賤子尤荷生成伏念某
性資懦緩門第單寒自出承明之廬已絕清華之望茲
膺視學之命漫無衡鑑之功竭心目以永三年飲冰霜
而滌方寸愧一齊人之傳無益於楚大夫幸魯兩生之
名獲聞於漢天子藉吹律而冬暖讀故事而春榮聞寵
若驚感恩欲泣附蒼蠅於騏驎之尾不待飛騫假鷄雀
以鸞鳳之毛自然燦爛從此尺寸之進步無非提挈之
鴻慈受長者之德已深同於幃載執弟子之禮甚謹莫
報涓誠分宜匍匐崇階頌揚恩造乃時當兩試之既畢
例無千里之遠行足趨趨而不前心悵惘而若失先肅
寸稟遙拜高麾伏冀俯憫至情曲賜簡畧明歲瀕行尚
容辭謝

祝巴撫軍壽啟

桓驄新涖霜蹄開塞草之青緹鶴初來仙羽帶關門之
紫吹黃鐘於天水萬戶春臺食石膽於秦州八荒壽域
風清鈴閣共聞韓范之名樂奏雲璈不度伊涼之曲邊

城喜溢屬吏懽騰恭惟黑頭元老赤縣行仙舊領三臺
人擬朝陽之鳳新資八座恩加常侍之貂計治秦者七
年平反度支竭口酬心計之力乃分陝而萬里折衝尊
俎真文經武緯之才雖帳旌節於西陲幸覩星躔於南
極前半月爲重九籬邊叢菊好泛金尊後八日而小春
笛裏梅花如聞白雪而况崆峒不遠廣成子自在人間
鸞鷲常來王母宮尚存山上遙想隴頭草木盡開瑤艸
之花塞下丁男共上華封之祝笑潘騎省春秋甚少乃
見二毛慕范長生服食何方竟登百歲岡陵豫祝几杖
將膺某才非早慧器不晚成弱冠登朝比荀中郎之年
已老一行作吏較王僕射之位甚卑每羨高密封齊八
騶前導茲見闕宮頌魯三壽作朋雖門下顏繇少孔子
者兩歲而太原王又知魏舒者十年徒感國士之知未
介公堂之壽用是虔修脯棗敬效葵傾料西極自有瑤
池不羨南山之酒乃北斗仍臨太乙敢忘東道之情伏
冀體天不息應地無疆仁覆六州手捧太平之歲月恩
隆九命足生上相之風雲遂使紫塞黃河或如帶而或
如礪并見青羗赤翟莫不貢而莫不王則臣朔雖飢獲
賜風聲之木愚公亦智可移王屋之山壽貴何可名言
功名於以不朽矣薰沐奉書升恒是祝

太夫人七十壽啟

六甲周餘七旬大慶值上巳之月春晝方長遇太平之

時華年未艾雖兒非萊子每思斑綵之衣孫愧蘭芽亦
產階除之末况當正誕敢後稱觴詎曰賢勞不遑將母
乃某一官匏繫廿載萍浮曾奉板輿莫遂晨昏之戀虛
言祿養并違菽水之歡見烏哺而感懷聆鶴鳴而惆悵
瓜期雖屆朝懸候代之條星使未臨例謹私歸之罰天
各方兮千里去住由人腸一日而九迴進退維谷情出
於至不得已勢處於無可如何先遣來奴及期叩祝衣
履虔備屏帳續成金銀之器一雙以介眉壽珊瑚之珠
百八用禱遐齡遙祝時維春仲承歡必在夏初伏祈母
親垂霽慈顏俯矜遠役頤神以介王母之福寬懷以俟
遊子之歸重酌霞觴彥深朝服而跪更施錦帨文若繞
膝而嬉則家庭之樂方長而母子之情兩慰矣

葉忠節公遺稿卷六

